

四庫全書

集部

欽定四庫全書

青谿漫稿卷二十二

明 倪岳 撰

墓表

文林郎四川道監察御史張君墓表

成化乙巳閏四月二十九日監察御史張君世用卒於南薰客舍予既與諸友往哭之其孤立將扶柩歸墓乃奉君同年友中書舍人楊一清所為狀踏門請文以表

諸墓惟君自正統丁卯克邑庠弟子員至成化戊子始克舉于鄉遂登壬辰進士拜太常博士簡授四川道監察御史歷官纔十有四年雖一再遷不過七品得年四十有九而已平日所抱負自視當如何卒亦不能究厥施豈非命耶君幼穎敏讀書過目成誦學易於鄉先生深有造詣年十七試藝京闈弗利督學憲臣恒竒其文以魁解期之文名熒然起淮揚間然往試輒北蓋久而後捷云君負才識有幹局初試政戶部協理軍儲給賞

河南潼關有功官軍因事裁畫時稱其能為博士有事
郊廟禮度閑習每以郊恩膺白銀文幣之賜為御史巡
視光祿不刻不縱出按福建鋤惡植善風裁凜凜聽獄
明決庭無留訟審錄重刑多所平反嘗奏黜閩帥之不
職者上從之一道肅然閩故多文獻憲節所至訪求先
賢遺跡存問其子若孫多作興而振起之尤以重學校
敦風化為首務登覽山川感今懷古不廢吟咏時以勞
勩得疾猶強起巡歷弗敢自逸及瓜之日案牒一清然

亦未始以才辯自雄既抵京師疾小愈念時之冒進者多名罷滯冗即具疏率同列論之朝廷嘉納焉甲辰地震京師君復欲條舉時政之弊者以聞會疾作乃已自是雖歸卧床褥乃心王事未嘗少置每與人言政事得失人才賢否上下古今治與亂有不當詞色俱厲氣勃勃不平如是者雖經日不厭人勸之亦不止以是疾益劇今年春上疏乞歸事下吏部未及覆可而君卒矣君性至孝能事其親疾且殆獨呼其子曰吾死不足恨獨

吾二親七十在堂不及終養所恨者此耳君明爽勁直
遇人無賢不肖皆驩然無間而宵中了不可混至與朋
友處所論與事是是非非輒面加詰難不為退言故久
而益信視義所在必竭力赴之不復顧忌周窮賑急恒
恐不及兩任皆清要然未嘗增拓故業服食儉朴如未
仕時惟於賓客之奉輒致盈腆觴酌笑歌必盡其情及
其持憲嚴肅雖至親亦不可干以私明易學有經指授
者輒能取科第為詩文旨意超逸格律深穩而於辯識

體裁評別高下皆出人意表識者亦以君為知言所著有竹西稿凡若干卷藏於家君諱稷世用其字別號竹西居士世居揚之寶應孝義鄉曾大父谷成大父仲仁父彥明以君貴封太常博士母鄭封孺人配孺人許氏戶部檢校文誠之女子一曰立敏而知學女二適古文陸全其幼在室其生為正統丁巳二月五日薨以卒之年某月某日墓在某之原君之中表弟尚寶司卿仲君惟馨予友也故君之交於予亦深以平日所聞於惟馨

稽之於狀其行誼表表可書以傳者蓋多矣惜余不能以盡之也若君者豈非慷慨不羣之士也耶君子謂君之志極高才極贍使大所遇其所建立豈不偉歟而年不待之也悲哉是為表

安成王處士墓表

處士諱緝字紹熙姓王氏其先撫之金溪人始祖德載李唐時刺史吉州按厯安成南里之金田愛其地勝因家焉傳至十六世孫曰鳳儀生文源文源生命仁命仁

生敏忠則處士之高曾祖考也處士生而警敏氣豪邁
有志事功家素饒於貲甫弱冠即出商遊荆岳間遂寓
居華容之板橋拓產益盛每得一美味必寓歸二親度
未及嘗不以入口歲時供饋者往來相望於道每歸省
於家克勤子職二親安焉嘗謂其配劉曰經營在外以
供甘旨吾之事也朝夕供養不違親志汝其任之故處
士久處於外無內顧憂亦劉之能相之也成化甲午有
司選充萬石長處士歸督賦有方催科無擾有逋負而

貧者輒為代輸故上足公稅下遠私怨人皆賢之壬寅
楚民大饑處士應詔輸穀七百斛華容陳尹將舉章服
榮身之令處士曰某不敢當必不得已願移吾父陳稱
賞欲成其志而二親相繼卒矣奔喪歸號痛幾絕塋祭
一以禮弘治戊申楚又饑處士輸穀視壬寅倍之時知
縣梁澤欲循例授以散官處士曰公家急難有財者輸
委臣子職也况所輸者楚地之產敢以此冒寵乎力辭
不受梁歎服焉時遠近居民恃以舉爨者數百家流徙

日過其門傾所有濟之不少吝賴以存活者甚衆既而以寓居卑隘將事營拓由是蒙惠者悉來趨役不約而同落成之日仍計功以償人尤感德戶部侍郎劉公大夏程公萬里布政使王公儼邑人也聞而嘉之皆為詩文以紀弘治壬子甲寅歲復連歉處士復出白金一百六十兩糴穀以賑視壬寅不啻倍蓰矣邑有板橋官道東西二橋歲久傾圯行者病涉處士獨任修葺蓋捐貲數百金知縣聞君嘉其義親詣賞勞仍令儒學教諭舒

珪為文立石以識至今名之曰安成王處士橋人有急
難告乏者周給恐後貸者貧不能償輒焚其券好禮接
賢士過逢觴酌必盡懽乃罷待鄉黨處隣里曲盡恩意
丙辰歲以久客於外浩然思歸即日趣裝以行遠近送
者遮道至垂泣不忍捨抵家不旬日即嬰疾以十月既
望竟卒人皆謂得正首丘實陰德之報非偶然也其生
為正統庚申二月望後二日享年五十有七葬以某月
某日墓在某山之原配劉氏有淑行生子一君珮能世

其業女一裕真孫男二長朝彥補縣學生次朝用孫女
二莖有期日君珮走南都懇于大司成劉公奉其族兄
刑部郎中懋中所述狀來請予文表諸墓上之石劉公
其邑顯者懋中族子姓其言處士之賢宜信不誣乃為
按狀序次之而為之表曰昔漢卜式以田畜為事方漢
事匈奴願輸家財助邊復持錢二十萬與河南太守以
助貧民當時北邊有饑西河歲惡富豪皆爭匿財惟式
尤欲助費故朝廷獨尊顯式以風百姓而史亦稱其拔

於芻牧亦曩時版築飯牛之朋至與倪寬並列亦賢矣
哉夫世之擅利以厚殖忍物而吝予者何限若式所行
誠不可以多得今觀處士雖於客寓之遠不異鄉邑之
厚捐貲賑貸至再至三惟急於施而遂隱其迹獨有其
實而亟辭其名則式之崇階顯爵率繇於此不已泰乎
其於處士之所存宜非所能及矣語曰不謀其利不計
其功處士有焉故予特論著之以為來者勸云是為表

明故承事郎順軒錢君墓表

南京少司空徐公公肅抵書於予曰吾錢氏之甥奉不
幸以疾卒其子奎將卜吉以葬既得里姻李司成為誌
其藏敢乞一言表諸墓道以示久遠謹礱石以俟予惟
司空之請切而勤司成之誌核而信乃受而序次之以
為之表曰君諱奉字思孝姓錢氏別號順軒系出吳越
武肅王之後有諱邁者仕宋守通州子亨父從建炎南
渡家常熟之奚浦常熟之錢相傳自亨父始至諱本忠
者復遷祿園以仲子衡貴贈吏部稽勲主事自是族聚

而居甲於一邑子伯璵隱德弗耀生子景豫少穎敏年
僅二十三而沒則君之曾祖祖父也母徐氏贈副都御
史同邑敏叔之女景豫沒時君僅三齡實惟母氏撫育
保護劬心瘁力君亦早慧有志繼述卓然樹立老成慎
重鄉長者咸器之錢氏族大而繁競以豐阜稱君方幼
孤弗任勞勩處乎其間若無所事事者而故產開拓田
園之闢輪奐之美日盛而月增人咸謂景豫之後為有
人矣君性孝友喪父時祖母周尚無恙奉養甚備及沒

喪葬亦盡禮痛父早世言及輒悲建祠堂以奉四時之
祭竭誠殫慮務於精潔事母承顏養志克盡子職極力
顯揚母節有司具以疏聞成化初有詔旌表其門君慨
然曰吾無以報國乃捐粟千斛以資賑貸得授承事郎
從六品散官君真實無偽義理昭融而不事表襮應事
接物咸得其宜人有不平者多就質君一言而決靡不
信服雖處富足而儉於自奉至於義舉則汲汲恐後祖
墓頽圯時加修葺龐趙寡姑恒迎養於家姻鄰之親與

閭里之賢者困躋則扶植之患難則拯濟之以至施善藥以已人之疾者給槨以葬人之死者捐衣食以予人之饑寒者修輿梁道路之病人之行者蓋不遺餘力焉邑嘗發民濬黃泗浦之淤區畫供餉君獨任之其行義蓋如此君年四十即不入城市惟以治生教子為事諸子讀書飭行克亢厥家家僮千指各授以業外內斬斬賓友過從禮意款洽士大夫咸樂親之以弘治乙卯九月十四日卒臨終惟以老母為念不及其他距生為正

統壬戌三月五日得壽五十有四而已初配龔氏先卒
繼陳氏子男八奎璧翼軫婁參星亢奎義官翼國子生
女三孫男三儼侃偉女八塋以卒之明年正月晦日墓
在來鳳里涸岡之原以龔氏拊嗟乎自古世家鉅族衣
冠累葉益隆而弗替雖祖考積善之基深厚而不拔亦
其子孫多賢繼承之不乏而後能然耳故古之論世族
者嘗謂敝化奢麗萬世同流蓋怙侈滅義者將由惡終
而惟德惟義惟以永年固其理也惟錢氏自吳越有國

以來五百餘年于茲子孫散處天下者夥矣而吳中之
錢獨盛若思孝君又其表表者然其所以稱賢于時則
惟以孝義之行勤儉之德泊然以居豐亨裕大之業所
謂世俗驕侈之習一鏟而去之譬之喬木之植其本既
固其枝幹柯葉日蓊鬱而暢達者由於培之者之有道
故也錢氏之澤其有涯哉故予因徐公之請嘉思孝之
行有可書者遂大書而揭之以為世家之子孫告俾亦
知所式焉是為表

墓誌銘

江西永豐縣儒學教諭楊先生墓誌銘

成化庚子九月一日教諭楊先生卒岳走哭之惟先生少與先考文僖府君為同憲友先考無恙時嘗為之作傳為著朋友相知之誼故敘述加詳蓋曰先生諱達景通其字楊其姓也山西平陽之臨汾者其世族應天之江寧則國初之所遷也諱伯林其祖純篤端厚為邑耆宿為鄉飲上賓諱彥用者其父也先生事彥用及母范

克盡子職沒能塋以禮兄執役京師事其嫂尤謹且為
嫁其女如已女其孝友之行也宣德丁未從大理胡公
槩所選拔俾游京校學日益進為詩文有奇思知名公
卿間卒業太學大司成重其賢同舍者推讓之及門授
經之士多所造就雖侯門世胄之子亦各成其材為時
名臣其修之已而及之人者也既久為場屋困年益長
乃自太學援例而起俯就校官之選景泰乙亥始得司
訓溫之永嘉居九載德孚教明士子懷服守宰以下亦

知尊禮去之日人不忍捨以績最進秩永豐教諭其教永豐如永嘉未幾即謝事歸則其小試於仕者也夫進不偶於有司仕不竟其所負位不稱其德落落才賢齟齬以沒固其命也春秋七十有一永樂庚寅十二月二十五日其生也配某氏有淑行曰宗錫曰天錫京庠生其子也都城之南鳳西鄉之原其墓卒之年某月日其墓也銘曰

修髯豐頤有偉於儀韞珍其奇出也後時卒尼于施伊

後之遺

山東東昌府臨清縣知縣顧公墓誌銘

成化十八年六月十六日知縣顧公卒于臨清解宇越
十有二日甲子訃至京師其弟僖聞之泣走告余相向
哭盡哀已乃問故曰望之夕既飯而浴出宿外寢比曙
卒有所中遽卒嗚呼痛哉明日僖奔公喪俾予為銘以
葬公予妻母弟辱愛最深往來京師日輒主予家情好
深篤也去年春公自滕始遷嘗墜馬傷足在告者數月

予心憂之九月予入朝道臨清見公于東岳祠驩聚信宿公戲擲杖以行示予無恙期以十月上任別來屢以書問之又數詢諸南來者聞公初政之詳不獨喜其足疾之瘳也豈意其遽至是哉公諱俊字廷秀別號肅庵姓顧氏世為蘓之吳縣人曾大父某大父至善封中書舍人考諱謙禮部精膳主事妣安人朱氏公生而聰穎凝重精膳卒時甫成童哀毀盡禮煢然如老成人安人嘗遘疾頻殆公奉湯藥惟謹夜輒焚香籲天乞以身代

疾尋已甚稱之少長從同邑嚴教諭翰授朱氏詩大有
造詣兩舉秋闈弗偶成化改元詔求遺才縣尹田某首
以公薦天曹試在優等試事冬曹亞卿博羅李公優以
客禮庚寅拜克州府鄒縣丞綜理馬政邑羣長輩素豪
猾每刻民以自植馬耗不能償民日益困殆兩病之公
下車首擿其姦惡者懲之其弊大祛律已廉公吏民畏
服未朞月償耗馬千餘足邑不知擾時方迎母就養尋
卒於官即日奉柩南歸民上章乞留者再格於例弗果

起復調滕縣滕於克為巨邑素號難治邑有守禦千戶所所官軍恃其驕悍視有司每挾其短長而制之去官之日率閉關攘奪輜重以為利習為故常民如其虐莫敢誰何公始上邑有盜劫人李百戶者方職警捕既受盜賄而縱之顧執邑民証以掠其財公聞而奮身往直之李大以為恨乃脅其長將交構公以禍公密詢其平日所為不法事聞之朝下藩臬廉得實悉置諸法別選其良者以蒞所事蓋數十年之蠹一舉而去之民胥慶

馬壬辰山東饑巡撫都憲年公推公能俾易粟東南就
饑者所在而賑之民賴全活者衆德府奏建宮室藩臬
檄公董其工二年始畢武城縣尹缺復命公署其事所
至藉藉有聲部使者交章薦其賢辛丑三月天曹以臨
清重鎮當南北之衝往往為邑者非貪則暴迄無善政
茲非審擇其人不可乃特疏舉公超拜臨清知縣為丞
蓋未九載人以為非公固不足以致此也時邑令缺久
事叢脞不治使輅往來至集需掊百出民亦貿貿無所

赴愬公至率五更即出視事退食公堂不及私室迄暮乃休剖決如流獄無淹繫比民苦供億使檄至隨所欲悉取於民民益不堪公皆預為區畫以待民不預焉至如首新學宮作興士類鋤強植善周窮濟乏他善政尤多民方如赤子煦煦之得慈母而公不起矣惜哉公性至孝處諸兄弟極友愛仲兄廣東僉憲廷望有文名雅愛重公公自幼從之遊家學所得尤深精膳公既沒家漸落公克自勤厲折節事學與今狀元吳元博綉衣林

朝信諸公游處故能切磋有成精膳公子四人偉俊傑
僖皆挺挺振拔而公尤傑然以出者也配吳繼張子一
曰某早夭以正統丁巳六月一日生得年四十有六卒
以無嗣嗚呼痛哉公墓在邑西陽寶山祖塋之側塋以
卒之年某月某日云銘曰

宜嗣而絕方進乃止彼賢則然孰主張是鳳羽中鍛臬
音高翔茫茫者天嗚呼何傷噫

大明故翰林院侍讀學士贈學士謚文僖張公

合葬墓誌銘

正統己巳秋北寇犯順擾我邊圉英廟赫怒親率六師以征時內閣重臣扈蹕者二人皆宿德重望上所簡命者其一則姑蘓張先生也師次土木敗績先生死之實是歲八月之望得年五十而已嗚呼痛哉既而朝廷錄死事之臣特贈先生翰林院學士階奉議大夫賜謚文僖遣官即其家以祭錄其二子恩至渥也後三十七年為成化己巳其季子太僕寺丞翔奉先生繼室太

宜人宋之喪歸金陵鳳臺鄉西顧村祖塋之原啓其先
配孺人王之窀以祔始具先生衣冠神主合窆焉謂岳
忝通家之義俾一言以銘諸幽岳惟先少保文僖公以
正統己未及第入翰林時內閣楊文貞文敏文恪三公
謂之曰汝同庠張先生士謙文章德行為時之望汝其
朝夕相切劘可也先生登進士已二十有五年方為翰
林修撰所居既相邇日往還益密每論文講學鑿鑿不
妄先公敬服焉岳自為童子時恒為岳言之而老成典

刑達矣嗚呼惜哉按狀先生諱益字某別號菴菴其先
吳人洪武初徙閬右實京師遂為應天之江寧人幼而
聰穎儀觀豐碩讀書過目輒成誦甫成童下筆為文辭
咄咄過人稍長入游應天郡庠登永樂乙未進士以精
鍾王學授中書舍人受勅命贈考豫如先生官母倪妻
王皆封孺人宣德初預修文廟仁廟實錄成賜白金綵
幣進大理左評事正統初預修宣廟實錄成賜白金綵
幣進翰林修撰九載進侍讀學士侍講經筵尋召入文

淵閣參決機務日見委任特賜金帶錦繡衣以寵之明年而先生遇禍矣先生先配孺人王監察御史同席賓之女淑德克相稱於閨門具於先生所撰誌其卒為正統庚申六月望日享年四十有五後以翔貴加贈宜人繼配宋封太宜人貞順自將一節靡忒撫諸子女不異所生其卒為成化甲辰正月三日享年七十有三先生篤於孝友七歲喪父賴母倪守節以教育之倪性嚴先生承順無違供養亦倍撫弟晉極有恩義庭無間言先

生於書無所不讀文章豐縟坦易類其為人居安朴儉
雖貴顯不異儒生詞翰名一時四方求者至集得片紙
隻字什襲以去所著文集凡若干卷藏於家嗚呼先生
碩學雅度足以經濟邦家表儀朝著然弗究厥施奇禍
中沮遂使從容廊廟之賢往當疆場搶攘之事忠義所
激竟以身殉嗟亦烈矣先生有男子二人長嗣以蔭授
鴻臚序班進中書舍人大理左評事直文華殿卒次翔
亦以蔭補國子生授四川簡縣知縣進今官有廉能聲

女子四人長適都察院進士鄒和次適鄉進士周宗次
適太僕寺卿朱奎皆王出也又次適武學生謝賓宋出
也孫男三弼麒麟孫女三長適章丘縣丞段璟次適錦
衣千戶焦裕次適內閣中書舍人劉榮曾孫女一尚幼
惟昔出京校官翰林者惟先生與先公纔二人耳及朝
廷賜先公謚適與先生同殆亦非偶然也矧岳又嘗與
翔同講學於是銘也其敢以不文辭銘曰

先生之文海澄山崇先生之德天和日融先生之節抱

義死忠鳳臺之原龍江之東衣冠儼然兩淑挾從歸兮
故鄉乘雲馭風用世弗竟裕後則豐揭潛琢辭以詔
無窮

大明故榮祿大夫後軍都督府都督同知陳公
墓誌銘

榮祿大夫同知後軍都督府事陳公奉命鎮守通州威
德兼著盜賊屏跡居民安堵行旅晏然上下倚之為重
在鎮三十年如一日以老乞歸罷鎮者七年為成化乙

已二月丁卯卒於京師之第家嗣珣以訃聞上甚悼惜遣官諭祭工部營墳以塋復命珣嗣公舊職為指揮同知蒞事南京錦衣衛蓋異數也塋有期乃奉中書舍人黃璚所述事狀謁予請銘諸幽先少保文僖府君官翰林時常與公往還余因得拜公每瞻其容止之彊毅聽其論議之嚴重恒竊識之而今則已矣惜哉按狀公諱達字弘道姓陳氏世為應天六合人大父晟自小校起從高廟定天下累功至素州衛指揮同知坐事落職卒

於京父啓坐累謫戍大寧從文廟靖內難復累功至忠義左衛指揮同知守遵化有功進階懷遠將軍子孫世襲還京師以卒宣德丙午公襲父職為指揮同知仍蒞忠義庚戌奉命督造黃舡于南京景泰改元庚午大司馬遴選克中軍營把總五月以薦進署都指揮僉事坐五軍左掖營時承已巳兵變之後通州密邇京師地大且重往往盜賊竊發廛廟堂之憂適鎮守員缺僉謂宜得知勇有為者始勝其任於是大司馬以公名聞遂進

實授都指揮僉事奉敕往鎮兼督天津諸衛地方壬辰
有白金文綺之賜天順改元丁丑英廟復辟賜勅獎諭
有克効勤勞之語且有金幣之賜戊寅錄其累捕強盜
功進都指揮同知庚辰上念公久効勞勩特賜白金十
五兩綵段二表裏鎧胄弓矢各一辛巳錄其累捕刼殺
兵馬范質等強盜薛英等及越城叛賊之黨都督哈哈
等三十餘起授以流官誥命成化丙戌今上即位之初
重公舊臣益隆委任復錄其自壬午迄今前後所捕強

盜六十餘起計二百一十五名功績惟懋遂進擢榮祿大夫後軍都督府都督同知領鎮如故時以直隸各衛京操馬匹往來馳突飼牧不時以致瘦損遂命兵部同總兵官遴選精兵二萬官給馬仗令回各衛以便飼牧其天津通州七衛者則勅公提督訓練云庚寅八月久雨水溢天津以北河堤衝決水利分洩舟行維阻朝廷憂之特命都督歐信工部侍郎李顥同公督京營并順天等處軍民夫役築塞公同心協謀工賴以濟壬辰上

念公久勞於外特遣中貴以大紅織金蟒龍紵絲紗羅衣各一襲馳至通州賜之人嘖嘖稱嘆以為朝廷優禮勲舊如此之至然亦公之忠勤足以迓承之也已亥公以年至乞休疏上者再上重違其意允之至是卒距生為永樂辛卯十月十有二日春秋七十有五先配夫人林氏錦衣指揮某之女繼配夫人王氏左軍都督某之女側室四人子男八人珣琇琦瑋璨玪璟璫孫男七人孫女六人曾孫男一人以卒之年七月某日塋於城

北昌平之原從先兆也公儀觀魁傑外和內嚴忠孝之誠端一無間與朋友交信義懇切面折人過不為苟合蚤喪父賴母撫鞠遣從里社師讀書精敏不懈舉動如成人母慮其以勤致疾恒泣止之公抱持膝下亦泣曰兒奉獲慈訓不墜先業即陳氏之澤遠矣脫或縱逸何以自立聞者奇之處諸兄弟皆薦恩義其在忠義居僚友間和而不隨多所規正有豪卒恃其狡獪挾持官吏者公即重繩以法衆服其能祭酒李忠文公冢宰王文

端公皆公先執友公恒侍請益二公亦喜公日驚於進
惓惓啟迪既領黃舡事告別以行皆以廉公勉之故公
於道路所經常廩之外一無所受至於鳩工庀材繕度
有法事易集而人不擾及抵儀真壩官吏弗謹舟有損
者懼得罪思賣緣賂公以祈免公盛怒斥之明日諭之
曰汝之不謹罪不可宥然亦悞耳第修治之尚懲其後
也莫不感悅服公之明比還二公聞之躍然曰陳氏有
子矣景泰初北寇陸梁為邊患少保于公為大司馬與

公語大悅資其贊畫故一歲三薦而位益崇時論惟允其鎮通州以敦風化正民俗為首務前政務為姑息事積不治公一矯之以嚴信賞必罰遠邇畏服時境內多盜公慎擇才勇之士分督悍卒踪蹟捕治有所獲即置諸法由是一道肅清民至於今思之所鎮當水陸之衝公卿大夫之賢薦紳韋布之士日往來其間公未嘗不曲為款納咸盡其情故公之賢聲亦藉然於時罷鎮家居手不釋卷見古忠義之士擊節慷慨惜不與之相上

下遇奸惡輩怒氣勃勃思唾其面善善惡惡盖天性然也薦於故舊有所匱乏賙貸惟恐後諸子森然玉立莫不修飭行檢無貴富習人固知公義方之教如此卒之日猶呼諸子訓之曰吾自幼至老荷國厚恩誓竭心力以稱任使猶懼無以自塞爾珣其服勤職業諸子亦恪恭朝夕庶乎無忝於前人言訖脩然而逝於此亦可以見公之所存矣噫方今朝廷內修外攘經理邊圉思得方叔召虎之臣宣力四方以佐戎辟而如公老成忠實

日就凋謝不亦重可惜哉故為之銘曰

陳氏之先載仆載興有偉榮祿克績以承赴赴帥桓三
以薦升節鎮通州閩寄是膺威名聿昭姦宄畢懲皇曰
休哉錫予頻仍宜進而止德望彌增豈不大施歛其才
能繫後之貽子孫繩繩昌平之封如丘如陵太史銘斯
百世其徵

大明故奉政大夫修正庶尹南京尚寶司卿白

君墓誌銘

南京尚寶司卿白君既上八日以前戶部郎中秩得通
理滿九載即解任獻績馳赴闕下未及入覲竟以疾卒
於南薰坊之寓舍鄉友工部毛員外理經紀其喪以歸
既歸將塋其子金復緘其邑人朱昱所述狀抵書於君
僚友吳主事彥華俾來請銘君子成化己丑考禮部會
試所取士惜羣早世銘烏可辭按君諱玠字宗璞姓白
氏其先本洛陽人當宋南渡時有諱繼畀者始遷於常
占籍武進因家焉曰明遠均寶守中君高曾祖也考希

原以君貴贈承德郎戶部主事加贈奉直大夫戶部員外郎妣錢氏初贈安人加贈宜人君生而聰敏少喪父母落落無所依遂挾書往金陵之句曲山寄跡朱陽館從黃冠師游忽感悟自奮乃之京師學於翰林編修徐先生文式及今閣老大宗伯徐先生之門久之大有所得補府庠博士弟子員益刻厲問學竟以書經領成化戊子鄉試明年試禮部賜進士出身觀政都察院授戶部浙江司主事主納通州軍儲以勞疾賜告歸抵家踰

年復起轉貴州司主事主納內庫銀絹壬辰奉勅給賞
遼東邊軍往時銀積羨餘所司多所侵匿君悉歸之官
癸巳南京公幹遂勘理浙江諸路鹽鈔時權貴私索累
數十萬商人大沮君極力裁革人稱便焉比還陞本司
員外郎甲午夏持節充副使往湖襄封王及妃有所賜
予悉辭不受陞陝西司郎中癸卯朝廷以運舟稽緩命
君催督首責香藥綱運之為奸弊者其徒歛避事賴以
濟山陝歉荒人相食議舉納粟之令他如僧道度牒生

員入監各以差等入銀以實官帑其所出納皆君主之人稱廉公未幾遂有南京尚寶之命君體素瘠而才識豐贍遇事立辦談議風生故為時所推許性孝友自傷蚤失怙恃因名其讀書之軒曰思親示終慕之意事諸兄敬愛處友和易持身謹慤人未嘗見其過初在鄉里或嫉其新進君謙以處之既仕貴顯益置不校人多其有容嘗買婢見其有戚容問之知其官人女也既養以為女擇良以配之兄弟老分俸以贍姪鎧為郡庠生即

捐俸金入官俾得援例補南京國子生其行義多類此
君起孤寒矻矻嗜學無所慕乎其外既仕久始買宅于
興仁坊之西凡祖遺業悉與兄弟居之既進列鄉復得
南畿密邇鄉邑乃於興仁之第築圃鑿池種竹構小軒
三楹榜曰隔塵且曰吾得釋去繁劇將營菟裘計焉豈
意遽止是耶惜哉君生於宣德庚戌四月十三日卒於
成化丙午四月六日得年五十有七而已配高氏累封
宜人子一即金補郡庠廩生積學有文能世其業輯君

平生之作有遠行稿思親軒稿若干卷藏於家其墓以
某年某月某日其墓在邑某鄉之原銘曰

其體則癯其才則豐噫始之困而仕之通期進于崇而
遽以終我辭銘之昭揭無窮

大明故驃騎將軍錦衣衛掌衛事都指揮使朱
公墓誌銘

弘治庚戌十二月朔上視牲南郊公職侍衛得佩刀翼
輦以行走趨過勞比暮疾作越十又五日夜漏下二鼓

遽卒所與為僚屬及族里親舊駭愕奔視相與嗟咨洒
泣朝之公卿大夫亦皆吊祭相屬傷善人之奄忽也訃
聞上悼惜遣禮部諭祭命工部治墳以塋盖特恩云葬
且有日其孤宸奉公之友田侍御所述狀泣請余銘以
掩諸幽按狀公諱驥字尚德姓朱氏世為京邑大興下
馬社右族至曾祖大始因子貴贈武德將軍管軍正千
戶妣郭贈宜人祖喜洪武中起家儀衛司積功至錦衣
衛右所正千戶卒考鏞嗣未幾亦卒俱以公貴追贈驃

騎將軍都指揮使祖妣張妣丁俱贈夫人公生而氣質
龐厚性寬大不喜刻核甫成童即從栝蒼潘流清習儒
生業長益嗜讀書喜學問樂與學士大夫游痛蚤失怙
事母極孝養既嗣職掌所事公勤明敏籍然有聲同列
久更事皆讓不及也嘗使湖浙一毫不苟取少保兵部
尚書于公方在重位名知人有女婉淑為擇佳偶聞公
賢乃以妻焉天順改元丁丑遂坐累謫戍威遠資產蕩
折公不以為意知者賢之甲申蒙恩召還任成化丙戌

以兵部薦擢指揮僉事佐理衛事戊子畿內盜不時發
敕公提督官按捕緝時以五城職巡邏者率玩愒怠事
乃命吏部偕公遴選去留擇才以充不拘故常而公復
摘發渠惡遠近肅然辛卯民饑攘奪以苟朝夕所司逮
捕得斗粟者輒坐死犴狴至不能容公爭曰此窮民非
得已者其情可憫也獄上多從末減有妖人真惠者偽
為書以誘惑同類多不道語事覺逮繫數十百人皆當
死公曰可罪者獨惠耳餘愚民何辜事聞惠竟坐死餘

釋戍邊有衛卒從公者當番休聞其隣偶以妖書傳觀者亟告公期因訶發得賞公斥曰此妄耳取書焚之滅其迹仍遣卒歸諭其父老始大驚悟散去先是公在謫北寇入邊因從總兵官高陽伯往禦之就陳斬獲酋長巴圖王以歸至是兵部論功進世襲指揮同知戊戌進指揮使命掌衛事尋進都指揮僉事甲辰上察公忠實可任特勅兼理機務公小心慎密未嘗妄興一事亦未嘗輒因事奏遣官校使外上下安焉冬進都指揮同知

前後所積擒捕功甚夥公有所奏列率推諸官校以故
從公蒞事者多累階至顯官而公不與也丙午上嘉公
勞勩特詔褒獎進都指揮使仍掌衛事累荷繡春刀綵
幣寶鏹時新珍味及續綱目諸書御製連環諸詩之賜
每進講經筵輒得入侍與宴歲南郊大祀輒蒙賜蟒龍
衣以為常公在位久恩眷優渥委任甚至公亦端確有
守不為勢利怵嘗奉命撻忤旨者或誣公用小杖上怒
命中使詰責數四公具以實對卒不易自持甚謹而待

人極恕諸屬中有可用者維持與進任之不疑凡有重
獄苟可以求其生者必為之盡心焉邇以兵部遴選軍
政大司馬獨奏疏稱公老成得體敦厚不刻時以為得
其實云公生於宣德庚戌八月二十四日得壽六十又
一配于氏封夫人以淑德相少保公女也子男四長即
宸次宏中書舍人于出次完翰林院四夷館秀才次宥
尚幼側室劉出女一嫁義勇右衛指揮同知王軌側室
王出孫女二墓在下馬社原塋以卒之明年二月某日

嗚呼世之仕者以得喪為忻戚姜繭奪氣揮霍動色轉
移俄頃耳甚則陵轢扇毒取快一時其為人賢不肖何
如邪公窮之在謫達之在朝其內其外終始弗渝寵任
隆赫處之泊如也書有之無依勢作威無倚法以削寬
而有制從容以和公於此蓋無愧焉余知公惟素是固
可書以銘矣銘曰

德厚而寬亦信以端惟時則賢退無所紉進有可述惟
賢則然功也弗矜寵也懼盈益慎以虔宜茂遐福奄茲

不祿胡奪其年恤典優崇噫孰與同有命自天我撮其
槩琢石以載于公之阡

南京前軍都督府掌府事定襄伯郭公墓誌銘
公諱嵩字惟賢姓郭氏其先鳳陽臨淮世家始祖某追
封汾陽伯高祖陸曾祖英國初從高廟起淮甸累功至
武定侯追封營國公諡威襄祖鈺追封定襄伯父珙尚
寶司丞季父登由勲衛進爵定襄伯追封定襄侯諡忠
武先是忠武公乏嗣以公器識不凡具名上聞請以為

後制可景泰間拜散騎舍人侍衛禁中成化壬辰忠武公薨遂嗣伯爵癸巳命分督五軍營尋奉命持節充正使冊封沂陽王于荊州乙未命往北直隸山東河南印錄馬匹丙申再奉命持節充正使冊封趙王妃于彰德丁酉上以南京根本地新江戰艦尤保障要務也乃命公掌南京前軍都督府事專督操江戍戍春痰疾遽作薨於官舍守備重臣以聞上震悼輟視朝一日遣官諭祭者再工部營塋事給舟歸其家皆殊典也公資性明

達軀幹魁偉自幼喜讀書好吟詠樂交接賢士大夫忠
武公文武兼資名重海內然性剛介少許可既以公為
嗣愛養備至擇名師訓誨日督課如儒生不少假貸公
亦克承其志益加奮勵藉然稱賢於時其在宿衛日近
寵光乃痛斥紕綺習謹飭益至既嗣爵日俛焉思所報
塞兩使王藩以禮自持凡所賜予悉辭弗受比蒞馬政
一清宿弊上下稱之訓練營卒咸有方畧寬嚴適中人
無怨言以戰艦行故事非其實及兵事當舉廢者為六

條疏請行之生平薦於孝友諸伯叔母無嗣者咸迎養
於家待宗鄙以和馭卑下以惠歲時祠享合族助奠恩
禮藹然嘗念尚寶公忠武公所遺詩文甚富乃蒐輯成
編為聯珠錄若干卷壽梓以傳其善行可書者率此類
人方期公遠到必將有為於時以弗忝厥世而遽止於
此惜哉距生為正統丙辰七月一日薨以戊戌正月二
日得年四十有三夫人孫氏太傅會昌侯繼宗弟錦衣
都指揮使顯宗女也有賢行先公卒子男一曰叅聘李

氏豐城侯男之女女一在室叅以卒之年某月某日塋
公江寧聚寶山祖塋之原乃奉其姻友都督府都事王
達所為狀泣請予銘予固其姻黨也為之銘曰

皇明開基羣賢彙起赫赫威靈元祀載紀忠武繼作樹
功自已世勲王家宜莫與比古亦有言必復其始公實
承之以續以似胡然遽傾孰秉茲理方俾之通乃尼而
止聚寶之原川流山峙歸安於斯何千萬祀

東牟處士錢君墓誌銘

先少保文僖府君與故南京吏部尚書贈太子少保諡
文通遺菴錢公同年入翰林契誼惟薦岳為童子時即
獲侍公几杖深辱教愛且嘗接交公之諸子惟時二季
某某皆績學英發不幸相繼淪逝獨公伯子景高甫承
公命歸綜家政卓然老成稱賢于時豈意方哭公之訃
曾幾何時而景高亦復長往其子啓宏初掇高第甫享
榮養而遽爾捐棄不亦可痛也哉啓宏將奔喪歸襄大
事謂予世交且厚乃衰杖躋門泣請為銘以掩諸幽乃

談其所自述狀而為之序曰景高諱岡姓錢氏景高其
字也別號東臯世家淞之華亭東郭至文通公徙郭東
三里汀居焉曾大父南梁府君妣許氏大父永思府君
妣趙氏皆以公貴贈資善大夫南京吏部尚書妣贈夫
人景高公冢子母封夫人莊氏生景高幼岐嶷異常兒
長從司訓李敬之授春秋日驚於進景泰初侍親官翰
林大比歲將歸就試公謂曰汝脫羈於官孰可任家事
乎于是歸而杜門不出惟以葺產課農為事或勸之仕

不應曰父命也公仕日顯撫按重臣至淞者必過其門
景高蕭然韋布不事干謁或有所詢應對鑿鑿必據於
理識者韙之二弟學日有成景高喜曰此足以紀先業
矣資給備至及疾竭力醫療沒為營塋與人言及輒慟
二妹幼為擇佳婿歸之甲戌歲饑盜入其家語之曰汝
豈樂為是哉迫於饑寒耳遺以粟帛盜即改行為善至
相率來謝時有富翁以橐物寓景高所不數月有回祿
之變為救護得存翁商歸度已煨燼矣及完壁付之其人

感激欲分其半以謝力拒絕焉成化丙戌公自東廣奉詔
歸閒乃建迎薰同善二堂以為娛侍之所凡事先意順
承無所違拂嘗有疾晝夜侍湯藥衣不解帶疾已乃止
癸巳公奉詔復起南京翰林載轉吏部每歲三月值公
壽旦必率諸子往致稱觴之敬人嘉其孝庚子公歸榮
於家所以娛侍之者益至莊夫人病疽危甚每夜禱於
北辰祈以身代遂愈弘治改元戊申公以高壽終景高
時已六十哀毀踰節棺殮喪葬務遵於禮景高事親孝

與諸幼弟處友愛彌篤交友誠信不欺個儻有為識見
超卓人有不平者得其一言即解殖產雖豐然以勤儉
自處不事華靡尤急於義嘗輸粟關中以資賑貸獲膺
冠帶之命至於宗族鄉黨之有貧乏者周贍恐後婚喪
不能舉必為給助逋負不能償必折其券聞啟宏登進
士即致書勉以厲節慎行無忝所生蓋名家詩禮之教
其所承傳固如此爾啟宏觀政禮部得朝夕相處喜其
學行端飭且晉膺華秩以馳恩於親諒非遠者而景高

不之待也惜哉其生以宣德己酉三月三日卒以弘治
癸丑八月二十七日春秋六十又五配袁氏淑德克相
子四人啟宏啟寅國子生啟容郡庠生啟賓女一人孫
九人文綬文曄文組文暉文曜文昞文恬女三人葬以
卒之明年某月某日墓在某之原銘曰

喬木之室其本孔碩允茂其植雪幹霜柯輪囷婆娑卒
隱于阿材羨弗售復厄於壽以蔭其後我斯銘之用昭
於時永寧于茲

姚仲武墓誌銘

嗚呼此子表兄仲武君之墓予母黨止君一人而今復已矣痛哉今年春君客京師病氣疾聞予奉命南來遂欲附舟而還時方五月炎暑乃求巨艦處之及舁至潞渚即昏聩不復能飲食行及潞縣益殆囑予為治後事適予弟員外阜尚送予行俾過其所為之經紀復遣人夜馳至河西務訪醫購木以俟既至即延醫與論脉藥所宜不一二劑即解自後漸能飲食予日令人護視已

乃平復如常惟肌肉未克腴耳比渡淮君過予舟謝曰
此真賴子復生予因丁寧以寬裕自處無更為怒氣所
攻庶免後虞君亦以為然抵家不數日猶以家務縈心
疾復作醫誤投以補劑乃更困殆踰於昔予聞之急諭
醫以前藥之功乃復一劑而安及八月既望予考績將
赴京過君告別聞君日三飯為之喜甚計必全愈豈意
別後疾復作醫且誤下之遂以十月十日卒於家予歸
及淮陽始聞君訃嗚呼痛哉君諱桓字仲武姓姚氏其

先抗之錢塘世家國初徙閭右實京師乃有籍于應天
之上元祖友直個儻好義有名於時殖產饒裕貲累萬
金妣王氏生子女二人女為先母夫人子則君之考諱
愷字秉和妣陳氏生君子女五人兄相早卒姊若妹皆
有歸獨遺君在韶甌時祖考沒既久家累罹鬱攸之變
日益衰替賴君卓然自立如老成人力幹蠱以為養拓
復故業既圖而新之復別購屋以居君負材局處事不
苟往來京師樂交接賢士大夫名公鉅卿率愛重君有

事恒託為料理君亦為之竭盡心力迄無所失以是君
遂有聞於縉紳間四方之商於江湖者恒願納交於君
性孝友早喪母念及輒悲事父克盡子職雖遠客於外
歲時供餽之具備為儲蓄未嘗少乏二姊寡居收養於
家日夕所供莫不充贍與人交篤於信義臨財取予惟
義是視周貧濟急汲汲恐後卒之日姻鄰交游靡不惜
之君初娶再娶皆吳氏生子一曰璉女一三娶何氏生
子一曰環女二璉既長授室遽遘疾而卒君以是重傷

中抱亦不可療嗚呼痛哉昔在正統初先母夫人既歸
先少保府君外祖妣王夫人實來視於官邸因留久之
而予不肖獲蒙撫育有成至景泰初先府君歸省始同
還南都遂與君兄弟同游鄉校兩族多故淪謝相仍幸
歲時一接見君得叙情款近嘗謂君疾既良已宜謝遠
遊以自適況予守官於南朝夕聚處為樂亦足矣豈意
遽至是哉君之生為正統辛酉九月四日其卒為弘治
丙辰十月十日得年五十又六而已君祖考以下皆塋

之大山之原或云墓地不吉故子孫多不壽今乃改卜地於長崗山之原以卒之年十二月十一日葬焉惟君之克振家聲再隆世業善行炳炳不可使之無聞于後顧知君莫守若者乃為叙而銘之銘曰

易仆為興故業聿增匪才曷能孝義著稱芳聞四騰匪賢曷承疾厄侵凌子父相仍彼蒼曹曹新塋可憑惟後之繩百世是徵

青谿漫稿卷二十二

欽定四庫全書

集部

青谿漫稿卷二十三
四

詳校官編修

臣李堯棟

中書

臣

劉源溥覆勘

總校官庶吉士

臣何思鈞

校對官中書

臣范鏊

謄錄監生

臣呂日永

欽定四庫全書

青谿漫稿卷二十三

明倪岳撰

墓誌銘

明故湖廣長沙府通判陳君墓誌銘

成化初予官翰林時郡人陳君堅遠領南畿鄉薦來謁予世翰堂癯然若不勝衣而言動不苟溫然君子人也再試春官不偶即挈家京師僦屋隆福橋西蕭然一室

兀兀以事問學四方之士多從之游如是者蓋十餘年
卒以不偶有司乃棄去就選銓曹拜黔陽知縣九載秩
滿進長沙府通判其弟鏡亦以某知縣為鄖陽通判兩
郡相望二難競爽時以為榮未幾予奉命來典南銓乃
聞君丁內艱歸以憂勞致疾遂至不起惜哉葬且有期
其孤沂謂予知君惟素乃奉夏銀臺所述事狀介鄉友
郁景章衰經躋門泣請為銘予方期君遠到而遽至此
方為悼惜不已其忍執筆銘君墓哉然誼不可辭遂按

狀序而銘之君諱鋼字堅遠姓陳氏別號遲宜子其先
居考亭宋相秀國升之之第升之仕至昭化軍節度使
子澤補京秩以言青苗謫明州子孫遂為鄞人至祖珪
國初以名醫徵詣京復有籍應天考諱愷號艾庵醫益
有名以君貴贈文林郎黔陽知縣妣張繼盧俱孺人君
生而性質清粹族兄都憲濂奇之謂艾庵宜篤意以教
因遣從金克明先生授經日有造詣遂占成化乙酉京
闈高第積學既久文名益彰辛丑往蒞黔陽邑邇夷俗

輕刑喜訟君力諭解之民知所向鞭朴不施公庭寂然
乃構堂曰面山日坐其中若無事者至於置養濟院使
窮者有所歸立社學使蒙士有所教闢山田餘千畝積
義倉至萬石使貧無力者饑無食者皆有所濟沅水迫
城每春輒泛溢為患君鑿石為隄而患遂息猺獠肆掠
每夜輒驚疑為害君堅卧不起而害亦除楚俗居喪多
擊鼓為歌而詞甚鄙君取古哀詞梓行邑中以正之使
民知送終之禮建寶山書院以祀唐死節張杆宋縣令

饒敏學使民知崇德報功之意他如遇歲旱禱雨輒應
定賦役公正有法山夷與編民爭田久不服得君一言
即決老稚爭肩輿送君其見信異類如此及他善政尤
多不可殫述部使者累以懋異之績聞于朝遂膺推恩
之典錫之勅命有撫字有方操脩弗懈累書上最之褒
尋亦有長沙之擢矣去任之日民攀泣不忍捨蓋得民
之深云及為長沙作來湘賦以自見藹然忠愛之誠殆
與賈生吊屈原者相先後善讞疑獄民有寃者皆赴愬

於君脩岳麓書院以祠文公南軒作極高明亭以待來
學之士奉詔重脩親藩府第費億萬計君撙節有法公
私不擾王甚重之藩臬亦倚君為用聞母太孺人訃即
日奔喪歸哀毀踰節竟以是卒得壽六十有四其生為
宣德某年某月某日卒以弘治丙辰七月十四日先配周
氏贈孺人繼金氏封孺人子男四沂濬皆嗜學淳潮尚
幼孫男二時應時閏葵以卒之年某月某日墓在某山
原君性孝友少喪母事父菴盧孺人克盡子職與兄鍾

弟鏡處恩誼尤篤平居喜好文事適興山水所蓄法書
名畫甚多有適齊紀行澣溪江臯湖南諸稿若干卷藏
于家居官清白始終不渝然留意民事所至有聲使天
下郡邑皆得如君其人布列於其間民病其有弗瘳者
乎乃至循良如君而又不獲大究厥施如此誠可惜也
銘曰

清廟之玉曰久在匱倚蘭之馥汎乎幽谷用之弗足毀
折胡速豈弟膏沐郡邑具錄青山之麓以瘞賢淑銘焯

芳躅百世是告

故朝列大夫四川等處承宣布政使司右叅議
致仕朱公墓誌銘

弘治丁巳正月七日四川布政使司右叅議致仕朱公
以疾卒于金陵之第其子嗣隆告訃於公館甥湖廣按
察司僉事曹君玉且曰葬必有銘然知吾父者莫子若
子其狀列事行將奉以于於當代執筆者玉旣聞訃而
哭已乃述公平生履歷之詳歸于嗣隆於是衰經踵門

謁予文以銘其幽公為吾鄉先進誼不得辭按狀公諱
貞字惟正姓朱氏別號息軒其先揚之泰興人勝國時
高祖某任龕山巡檢慕錢唐山水之勝因往卜居焉曾
祖復嶮縣尉祖緄入國朝為大都督府宣使黔寧昭靖
王沐公重其學行為請于上延為塾師改授學錄始家
金陵考皞以家學嗣居師席故黔寧之世克篤忠貞蓋
有由也母平氏虎林仲微先生之女有淑行通小學女
教諸書尤善教子子四人公其仲也少聰穎異常兒甫

十二即辭父母從國子助教張山觀先生授詩經每朔望始一歸省及張去任復從禮部主事謝廷輔卒業授書經補應天郡庠弟子員益力于學景泰癸酉領京闈鄉薦天順丁丑登進士高第擢河南彰德府磁州知州時朝廷遣中官取異魚磁地所產不多民苦逼迫貳守以下將引避公不可曰朝廷設官以為民也乃秉誠禱于河異魚湧至且委曲調護民免於擾內閣南陽李公鄧州人聞公政績遂薦為鄧州知州天順壬午歲也公

嘗聞鄧州及所屬內鄉新野二縣之人往與本省閩鄉
及陝西一帶驛夫更易走遞但彼土著之人素號貪狼
故至者輒被抑勒捶辱並施財力俱困歲以為常無所
於愬公乃具疏乞各於本土應役庶免斯患遣人以聞
報可自是民享其便李公聞之緘詩以賀甲申以公務
過磁民具壺漿以迎者數十里時南陽守適與偕行見
而嘆曰世之仕者既去而不敢復造其地者有矣君何
去思之深也成化丙戌荆襄劉千斤作亂朝廷命將討

之兵行所至供億百出稍遲則典守者輒被叱辱且攘奪一空將次鄧州民皆蹙首以俟公乃擇儒學生員有幹局者令各具衣巾分主其事至則叱辱無所施仍極力營辦軍用不乏害弗及民是年冬丁外艱明年丁內艱起復陞南京刑部郎中仁恕明允獄以無冤三載考覈得賜誥贈考如其官母妻贈封皆宜人尋陞四川布政使司右叅議奉勅總督松潘等處糧儲松潘地極險遠每歲會計邊儲民憚轉輸之艱寧甘拖欠甚者逃去

以為常間能運至而前之官此者或厭於煩不以時受
坐候既久姦弊滋甚民益苦之邇庾不充率由於此公
至勤已恤下凡轉輸至者即與收受不以多寡為限民
樂趨焉嘗欲奏請東西二路每於中途設一倉俾得兩
次倒運以便民封事已具以與巡撫所議處者不合而
止恒以為恨公又以沿邊守哨多以免死罪者充但去
家既遠衣食俱乏強者則逃弱者則死公嘆曰此豈立
法備邊恤刑之意況舊有量給口糧例乃達之巡撫旗

軍月五斗舍餘月三斗自是至者得安其生無逃亡之患矣松潘地與西番諸種相隣不時剽掠為患公撫禦有方不復肆虐惟黑虎一寨獨肆桀驁招懷不服公與總戎者謀密為勦捕闔境以寧事聞賞典將行而公遽以老具疏乞歸矣瀕行軍民攀送不忍舍鎮巡大臣及諸司縉紳皆為詩章歌咏其美盛供張以餞觀者榮之癸卯春抵家躬葺田廬為娛老計郡舉鄉飲必敦請以為介賓勝日則與鄉士夫故老效古人真率會以為樂

雖年踰七望八而康強若少壯惟以詩酒自適於林泉之下意泊如也性至孝痛親蚤世每歲時祀享未嘗不泣下沾襟保重遺體不棄膚髮慎於交際雖遇童子必以禮以故居鄉居官與物無忤尤樂賙恤親隣有喪貧不能舉者率為資給有舊識某者稱貸久不能償公召其子以故券與之去祖塋數里許別擇隙地以葬臧獲之亡者其所存長厚蓋如此自幼工楷法晚變為行書駸駸古人所著有息軒稿若干卷藏于家公既嬰疾度

不起即召嗣隆語之曰我敎歷中外不為不顯優游桑榆不為不壽多福令終幸兼有之茲復何憾惟汝讀書飭行勉圖立身之計吾目瞑矣遂卒距所生永樂辛丑二月一日享年七十又七先是三二年公於壽藏衣衾棺槨之類悉為營建務底堅美肆今無倉卒之慮人益高公之識云配唐氏封宜人燕山右衛千戶禮之女側室楊氏子二長即嗣隆應天郡庠生娶王氏錦衣衛指揮俊之女次嗣賢蚤卒女五長適即曹僉事王次梁王

陳裸胡鑑陳節皆京衛指揮孫男一臣忠孫女二皆幼
葬以卒之年某月日墓在江寧縣長泰北鄉鷄子山之
原銘曰

朱氏之先世以儒顯有賢嗣興蘭茁於畹德馨發聞優
入時選班資屢升恩命亦腴郡以惠施獄以平讞于蕃
于宣素蘊畢展倦遊東歸世累斯遣官業之承惟後之
衍鷄山之墟卜宅非遠焯行著銘百祀其闡

中奉大夫江西等處承宣布政使司右布政使

致仕秦公墓誌銘

江西布政使司右布政使致仕秦公既卒之又明年為

弘治丁巳越

闕

月

闕

日其孤銳始克奉公柩葬于邑

惠山聽松菴之南乃具里彥李舜明所述狀俾來請銘
昔公之以微恙去官吾黨縉紳之士咸為之惋歎而今
則已矣按狀公諱夔字廷韶姓秦氏別號中齋宋淮海
先生少游之裔先生之子湛倅常州乃有籍于常先生
初葬高郵後遷于錫至公六世祖瑞依墓以居遂為錫人

既而遷今所居鳳光橋者公曾祖諱彥和諱季昇者公之祖以厚德重於鄉以能詩名于時始封兵部主事進武昌知府諱景暘者公之父其配殷封安人贈恭人者公之母也公生數歲以穎敏稱武昌遣從楚府伴讀余季樞游卒業于東平知州劉超遠之門學有造詣遂領天順己卯京闈鄉薦登庚辰進士第奉詔賜歸明年入朝拜南京兵部武庫主事進職方員外郎再轉武庫郎中成化壬辰出為武昌知府以內艱去服闋轉江西之

建昌乙巳擢福建右叅政嘗在告者逾三月丁未進江
西右布政使遂以疾致仕此公歷官之槩也公始筮仕
勤勵弗懈有志事功其在武庫即奏革隸卒之冗者以
杜請托迄今民受其惠其在武昌地大政繁且藩臬所
蒞事恒掣肘公至首除奸惡植良善興學課農積穀緩
刑創養濟院定均徭法一意愛民如恐不及巡撫都御
史繁昌吳公永新劉公前後至皆禮重公仍下其均徭
法於列郡行之嘗祀神至江許見一婦反接投沙中氣

將絕頃之少甦扣之則曰妾杭人柳氏隨夫商於外為盜劫殺將污妾拒不從因投于此公即收置屏處蹤跡得盜寘之法歸婦于其家優人李昆寓長沙見陸氏女美而多賢乃百計求得之其族兄來赴秋試具懇於公公按正其罪女還陸氏由是巡撫巡按及藩臬之長交章疏公治行為湖南第一旌擢將行而公以憂去先是郡中百需皆取辦諸市久不酬直民用怨咨公乃閤帑藏之以贓罰名者為銀若干兩即散給市民歡動閭巷

或曰公且去宜私其餘公怒斥之悉籍其數置故處乃
歸民至攀轅不忍捨有役均訟平之謠其在建昌民尤
健訟公治之如武昌始皆懾服廣昌有何姓者與令有
隙他民將訟令令疑之乃陰令人首何罪惡密捕得之
論以極典何族訴於公公疑焉詢之人曰冤也乃逮首
者詰之曰爾胡得厚誣平人吾固知非爾心也第以情
言之否且得罪其人流涕吐實何遂免死吉水彭伍二
大姓相奏詰逮者百餘人歲久不決憲臬以屬公擇曠

地人相距數丈則立一木繫之使不得相耳語乃次第
鞠之語或矛盾輒加考掠不旬月盡得其情獄成民伏
辜聞者快焉其治瑞州獄亦然此公政績之著也公自
幼嗜學於書無所不讀為文章下筆累數百言滔滔無
滯詩清麗有唐人風書法趙松雪景仰先哲所至考求
遺跡脩舉廢墜如武昌新張乖崖祠葺黃鶴樓建昌復
李泰伯曾南豐祠皆措置有法役弗及民遇山川佳勝
處登臨懷古形之賦詠尤多性剛直善善惡惡無所苟

故平生所交游必清介有文之士待寮友一以信義處鄉黨遇族姻和而有禮平居簡約未嘗輕涉公府此公學行之優也性孝友以殷恭人沒弗及奉含歛每言及輒慟事武昌敬愛備至在金陵建昌皆迎就養及致政歸尚無恙乃作五峯草堂天全亭於九龍山下建隆壽堂於所居之坎隅日與二弟旦奭奉武昌游衍其間武昌喜談詩好登山臨水為樂每遇勝日必延致騷人墨客親奉杖屨以從鄉人榮之如是者數年及卒公哀毀

踰節疾復作瀕殆乃執二弟手索筆為書惟以弗克躬
襄大事為恨言不及他此公孝友之實也其卒以弘治
乙卯十二月十二日距生則宣德癸丑五月三日得壽
六十有三所著中齋集若干卷藏於家配沈氏封安人
進恭人子男一即銳攻舉進士業為邑庠生女五皆適
儒族初公既得吉壤茂林脩竹秀蔚而深窈心且樂之
將營壽藏而未果至是銳乃即其地營建塋域具如法
式蓋踰年而後成遂以葬焉惟公卓犖之才清粹之行

勲名炳炳方將追軼古人而弗及大施遽以疾沮豈造物者亦有意於其間乎否耶嗚呼惜哉銘曰

惟貌之癯惟德之腴揚于天衢焯乎今譽其進也徐雄藩載居公望未踰公才有餘忽然懸車公體之瘳若彼龍駒扼於馳驅孰不欵欵公心則娛山水盤紆以為親愉九龍之墟爰有幽廬擅美一隅惟公所須我其銘諸百世弗渝

故味菜居士沈翁墓誌銘

弘治丁巳九月五日金陵沈翁文實卒於家其孤武昌同知景聞訃奔喪歸卜以十二月十八日奉公柩葬之安德鄉大山之原啟厥配芮孺人之窶合窆焉復奉同庠鄧秋官存德所述事行介俞大尹黼衰經謁予泣請為銘以掩諸幽子於翁有里姻之舊因憶丙辰春景以述職之京嘗干予言歸為翁八十之壽遽忍銘翁墓哉按狀翁諱誠姓沈氏文實其字別號味菜居士世家浙之錢唐國初徙閬右實京師始有籍于應天之江寧祖某生二子長德字本道次貴本

道生二子長容次即翁容隨貴執役北京以卒遺翁父子甞
然獨存翁幼聰慧嗜學蚤有知識父母鍾愛焉甫七歲選
補京庠弟子員未幾而本道甫遽卒奉母徐以居孤孱相
倚克自樹立服闋尚垂髫內理家政外供公役日不暇給遂
無意進取日以侍親治家為務攻苦茹淡艱辛備嘗既長
授室淑德協相竭力營養徐安其孝翁天性淳朴酷嗜淡
泊不為侈靡習勤儉自律拓產日裕然臨財施予不少吝
蚤事儒業晚乃究心佛老之典留心課誦若有所得自幼

不嗜肉味蔬食菜羹意泊如也間喜繪事興到落筆自成一家幼嘗有言祿命者謂其數厄四九翁憂之乃默叩於天曰某不幸九歲喪父母方三十撫育有成母子二人更相為命無他兄弟備養脫如數言母將安歸願天少假數年畢志終養得朝掩母壙夕死無憾矣卒之既奉母終復享遐壽人皆謂翁孝誠所感也居常無所事遇佳時勝日集子孫於前引觴小酌聊以自娛或歌道情或誦古人嘉言善行以暢懷抱且以示庭訓焉興

有所感輒形賦咏不求工綴適意而已手錄為編題曰
居家日記其教子者有曰休負男兒七尺身乾坤道合
始成人龍豬分別由勤惰切莫蹉跎競寸陰其自詠味
菜有曰每日三餐把甚嘗家園挑菜作羹湯肥甘適口
雖云好曾似根頭滋味長語意真切不事繩削率類此
嘗諭諸子曰吾父沒時屬吾母曰汝守此子宜令讀書
為善人時伶仃孤寡窘迫無奈每思遺言痛恨入骨爾
曹其務進脩以成先志乃吾願也翁之配芮氏有淑行

先翁卒生子五昇昱旻景杲昇旻杲蚤世今存者昱克
事幹蠱以世其業景資聰敏翁教之亦篤遂以明經領
成化辛卯鄉薦擢廣東潮州府同知起內艱改武昌所
至有冰蘖聲女二孫男三泰和雍曾孫男一女一翁生
於永樂丁酉十月十日享年八十有一初江寧尹劉傳
知翁高年篤行請為鄉飲饌賓翁辭不獲自是在賓席
者二十年後以輸粟賑邊得奉恩詔有冠帶之榮然景
歷佐二郡政績著聞貤封可跋而翁不待也惜哉銘曰

菜根可齧信民之言味菜以老終謝囂喧失怙胡蚤曷
雪煩冤孤孱僅保竟沮高騫家聲再造孰為之援天錫
壽考亦有雛鵠世澤如潦克濬其源山水環抱大山之
原我銘墓道百世弗諼

封南京戶部福建清吏司主事曹公墓誌銘

南京戶部福建清吏司署郎中事員外郎曹君祥聞其
父以能公訃號痛欲絕已乃匍匐歸襄大事屬其僚友
浙江司郎中胡君璟狀公事行詣予乞銘以葬按狀公

諱祖才姓曹氏以能其字世家徽州婺源高祖英芝始
遷徽城南市遂為歙人英芝生彥忠彥忠生永卿又遷
歙之南雄川生忠仁壽九十餘恩詔授以冠帶娶張氏
生子四長即公也自幼賦性淳朴強毅有為甫冠即能
代父綜家政克允厥宗既壯客游于外上下江湘京邑
間所至親賢取友人亦敬愛焉積貲日裕一毫不以自
私弟觀為郡庠生資給周至俾得一意于學遂領成化
辛卯鄉薦人多公之力居嘗闢田園廣第宅墾山數百

畝植以嘉木今賴其用自奉儉約歲時伏臘祀先待
賓必極豐潔與人處鯁直不苟同鄉人有不平者多
就質公為譬解之罔不信服遇宗黨有禮撫臧獲有
恩其教子姪則嚴祥以禮經領薦京闈遂登成化甲
辰進士姪禎倚前後領薦而起皆出公訓祥既授南
京戶部福建司主事弘治辛亥之歲以績最得推恩
於公授承德郎迎養官卹適壽七十同官者嘉其榮
壽相率繪圖賦詩以賀時人榮之未幾歸歛悉付家事

於子孫日與故人賓客放浪山水間步履輕捷不異少
壯襟度坦夷雖遇童子語溫而氣和鄉人重其雅量焉
衆方期其壽考殆過於父不意以微恙遽卒實弘治丁
巳十一月二十一日也享年七十有六距生則永樂壬
寅閏十二月十八日娶陳氏有淑德先公卒贈安人子
二長即祥次祺女五孫男五漢海澄深滢孫女三曾孫
男女各一葬以卒之來年某月某日墓在某山之陽銘
曰

植木於原克培厥根雨露所滋以茂以蕃孫枝挺出匠石旁援梁棟榱桷其用則繁猗翁種德式大其門嘉樹在茲高誼弗諼世澤敷遺以裕後昆我銘其藏不朽者存

大明勅封孺人亡妻盧氏墓誌銘

嗚呼吾尚忍銘君之墓哉痛惟先考太子少保文僖府君在宣德初與今浙江布政司右叅政盧公雍同以垂髫之年游京校相好也雖兩家祖若父亦交愛重之不

帝親子弟居嘗戲相謂曰他日授室生子必講姻好既而果然嗚呼孰虞斯好之不終也哀哉君諱允貞字德恒別號恒菴其先本吳人國朝徙閩右實京師籍于江寧叅政公其父封兵部主事諱清其祖也母封安人顧氏廣東按察僉事諱儼其舅淇學諭贈監察御史諱敬其外祖也君本宦家產稍有知即熟聞諸大人詩書之訓五六歲時輒能動遵禮則不妄踰戶閤言笑斬斬知自貴重內外族稱愛為奇女公在學宮不時歸安人晝

視膳夜事紡績君率能佐其勞安人恒苦疾至不解帶
以待湯藥如老成人讀書攻女紅皆如素習不煩姆訓
天順丁丑公登進士明年君隨親上京師又明年先君
為怨家所構下獄君聞之隱痛成疾甲申予忝進士君
年十有八公以歸予時先君尚在謫君朝夕北望不忘
修饋未幾有詔賜歸君執婦道惟謹先君喜謂公曰吾
兒婦殆女中狀元也又數數謂人如謂公者成化丙戌
先君自禮部侍郎休致南還己丑予乞省覲君在行歸

杭展墓亦請偕往明年家值回祿居業蕩然先君弗憚
予圖所以慰釋其意者甚切而未得計君謂予曰吾舅
甫脫憂患豈可重擾其心君雖初仕甚貧然非有以安
之不可也吾盡斥簪珥屬或可貲費其先置屋數楹奉
居之而急就職藉祿以養何如予曰然明日即携以出
市大屋三楹建之故基規制弘敞先君大悅乃還任得
請祿以歸於親嘗念予未得嗣屢召媒妁多為之置妾
曰以廣後也且厚撫之曰吾固惡夫妬者然非懷之以

惠亦烏能安其心有識皆以為難恒以不及逮事姑又
違遠先君之養日往來于中每誕日輒先期製袍服以
獻必自己作極精乃已四時之祭躬視烹茗以豐以潔
丙申先君賀萬壽留京一月君竭力侍養親致甘輒以
夜繼日不知為勞因益重其孝明年疾解尚書政予亟
圖歸侍君復謂予曰君侍經帷講明春春坊進學君或
預選則未可言私幸早圖之遂以季冬拜疏以行既歸
予日以迎醫問藥為事朝夕起居之宜衣飲之節君獨

任之如是者逾年醫禱無效易簀之夕惟予與君侍側
襲欽服用多自君手將殯君病未能興大慟曰天乎胡
不佑吾使吾病弗獲協相夫子以襄大事終天之恨奈
何發引日力疾強扶以出攀號欲絕悲動行路及反哭
則宿恙洒然去體矣亦君孝誠所致也庚子春君病飲
食嘔逆醫診之曰此孕脉也不月愈予心異之自茲體
履康和大勝疇昔秋八月二十又二日君產得男頃之
君遽卒兩族環視一七莫施嗚呼痛哉始予嘗謂君曰

君久乃字殆天授也其亦先人在天之靈有以陰相其
後然歟豈謂其遽至是也嗚呼痛哉君穎異慈淑孝友
之行清純之質本於天賦自幼為大父母父母所偏愛
而君能心其心公無嗣實厚藉君而君委曲承順亦至
公叅閩藩君始與親違夢寐其側靡一夕間壬辰公來
朝感疾幾殆君露禱北辰剖股和糜以進疾乃愈迄不
令公知公歸閩安人歿先是君夢不祥甚憂之卒以訃
聞驚絕久乃甦蓋其一念之篤恒相通也君之待姊妯

和而以恩處宗黨慎而有禮御羣下周悉而無失制行有
常終始無二雖有負其德者亦不為變親禮賢淑如嗜飲食
避遠醜惡至不欲視仁聲義烈著于壺彞族姻戚疏莫不
法式平居把卷執策不異儒生每考論疑義及古人賢否事
善惡成敗疊疊不倦家有國朝重編列女傳視舊書為詳
君日繙閱不暫去手恒取賢母貞婦事圖置座隅曰此吾無
言之師也善吟咏而不時作謂非閨闈所宜遇會意處每
有佳句多棄不錄及卒蒐其書篋得數紙焉其於星歷醫卜

亦留意嘗訂正圖書手自校讎恒市善藥以已姻識者之
病善繪事而不屑拈弄粉墨至所臨寫若杏園璿璣九歌
諸圖專門者稱賞其精組紉刺繡之藝少構思即出人意表
雖至巧者莫能及見事超捷胸中大有衡尺族衆以時見遇
事可否是與非必就質君得一言帖帖信服雖予亦得以
咨決所疑供職暇可肆力問學無家政之擾者蓋君贊成
於內多矣一旦失此良佐顧何以為情也哉君未卒之前
三日通江何生為予占得豫之上六曰孕生男未祥也卒

之日君謂予曰吾夢登山見泉竇焉其流甚微旁有人曰
將發卒開濬其流始大且有後福有頃而海神者邀吾
燕供張甚盛也至是追占二象曰雷出地奮陽出於陰
生男也冥豫有渝樂極而變災咎至也水陰類其流之
微不通達也海神之召去而僊遊也嗚呼其告之矣君
嘗因予任編脩滿三載得賜勅封為孺人距其生則正
統丁卯正月十有六日得年三十有四而已君之子彌
月見於祠堂名之曰孝孫亦曰應麟因朝奠以告君以

是歲十二月庚申葬君于江寧縣新亭鄉祖塋之次去
先君先夫人之封二武銘曰

維質之清維行之貞天聿成只壽不孚德匪君宜得天
或普只遺親於獨禍我亦酷孰司平只命服在躬舅姑
之從于新塋只我揚君休向傳其收抑稱情只天錫爾
後君尚篤祐永厥承只承後其延維千萬年徵茲銘只

金母王氏墓誌銘

金陵有以嬰醫世其家者曰金氏至某尤精其業著聲

於時諸子亦讀書秉禮克敦士行余以里姻故獲交其父子間恒羨金氏之多賢也豈其先人之積之教有以成之如此哉乃成化庚子十一月闕某之母卒明日

命其子琮持狀謁予泣請為銘以掩諸幽予受而讀之而後知其世德之深長慈訓之篤至也母姓王氏諱妙智考德名妣樂氏先故杭族永樂初隨親徙京師家於金陵金於王有同里之好母生而柔淑其親為擇佳配得金氏之良曰彥端者歸之歸僅旬月舅剛中府君以

御醫隨文皇北狩彥端侍行即解簪珥以佐行費姑太
安人張性至嚴母事之不違其心無忤於色躬事紡績
以致甘腴安人安之剛中卒于官彥端歸骸骨貧不能
葬母益出嫁資以左右之彥端兄彥聲亦以御醫侍仁
皇北京留諒宏二子金陵母撫之不異所出與某同就
學歸必督課所習寒暑衣飲先彼後已諒後累官太醫
院使雖老不倦母訓焉舅姑相繼沒歲時祭奠必躬必
潔嘗置婢婢思其親而病憫而還之度已費所直竟不

復取孝義之行蓋出天性云彥端喜吟咏晚號杏庄日
與騷人墨客優游山水間以意其適無纖芥內顧憂人
益多其壺相之力也彥端既沒綜理家政教其子撫諸
孫攻醫業儒斬斬有法益又若干年壽八十有九而卒
其生則洪武壬申五月闕子男曰銘即某甫曰鑄早
卒女四適嚴繼周澄時讓周鍾孫男四玘琦琮璿曾孫
三城山谷女二玄孫男一卣以卒之年十二月辛酉啟
彥端之窆附葬於安德鄉李家山之原琮之言曰吾大

母相夫以禮起家以勤奉身以儉律己以嚴孝於舅姑
和於妯娌仁於臧獲慈於子孫幾期令終可謂難矣嗚
呼不有賢母烏能成其子若孫之賢哉是則可銘也已
銘曰

孰揭揭以遺後之賢乎而孰悠悠以歸其全乎而猗嗟
壽母亶食報於天乎而

亡妹兵部司務楊君孺人墓誌銘

嗚呼吾妹之喪殯于寢堂逾一載矣因良人奉符使關

中始得輦歸葬于長安縣鳳棲原先塋之次實弘治甲寅月日也嗚呼定君處父母家凡為子之道歸于夫家凡為妻為婦之道咸有可稱者而亦惟予知之悉也乃誌于石而銘焉以掩諸幽以示于後固以紓予永訣之思而亦其良人之志也嗚呼定君諱淑靜定君其字也倪氏之族上世自杭徙南京有籍上元曾大父大父府君皆授誥贈官南京禮部尚書妣皆夫人先公南京禮部尚書贈太子少保謚文僖府君登正統己未進士及

第入翰林始請命歸舉親迎之禮而先妣夫人姚氏乃
歸先公偕入京師生不肖子女六人夭者四存者二則
不肖與吾妹耳定君以正統戊辰六月二日生生而先
夫人以產致疾越又明年庚午先夫人棄背定君纔三
歲幼且久病目賴外祖妣王夫人撫視有成先公及先
繼妣夫人郭氏愛惜逾諸子定君生有異質眉目秀麗
性識端邃莊重自能言未嘗妄嬉笑不與同類游戲日
侍二親側孝和恭惠順適其意習女紅不煩姆教烹飪

調齊若出於素天順己卯禍變陡發先公遠徙于宣定
君哀隱于中憂形于色人不能堪外祖妣夫人遂挈之
北行涉歷顛躓心則甘焉維時太子少保戶部尚書關
西莊敏楊公寔與先公同年及第入官契誼惟篤太夫
人武城李氏亦夙于先妣夫人善仲子時數資稟純懿
謂可作配媾言既諧嘉禮斯講及歸于楊貞順自將忿
忌弗形肅焉秉禮婉焉效德躬佐講習勞以待旦平居
必敬必親克致舅姑之養必慎必睦不失妯娌之歡姻

族歸賢率由是也成化甲午時敷領薦京闈益勤勸相
異于大成己亥莊敏公歸休奉侍彌謹殫誠竭力起居
賴之婦職之脩閨閫鮮及公卒時敷廬于墓者三載共
養益至太夫人安焉終喪哀勞形色為瘁及侍太夫人
京師復與子會而時敷亦以久困場屋出就選格為兵
部司務顯融有漸歡聚不時而定君日以疾告矣醫禱
兼至迄不可療竟以是卒時弘治壬子十月九日也得
年四十又五而已生子若女七人皆賦質娟秀皎如玉雪

不幸相繼天沒久或逾歲近則彌月保抱撫視艱辛萬
端是可痛哉今有子一曰伊瀛愛養無間人莫知其所
自出益賢之嗚呼定君早罹憂患中遠骨肉百念縈鬱
未及一遂良人甫躋宦途而遽焉長徃德厚而壽弗延
勞多而報乃畜其命之薄耶亦數則然耶孰謂天可問
也耶遂收泪以書俾刻而墓焉銘曰

金陵倪宗既遷于杭迨我先公復升朝行生此賢淑克
婉于良壽弗符德是則可傷情悼于邁于彼咸陽南北

東西茫茫四方竟無不之何必故鄉惟後有徵以識其藏

明故資政大夫南京禮部尚書致仕贈太子少

保童公墓誌銘

弘治丁巳秋南京禮部尚書童公秩滿三載以疾弗任
朝謁具疏懇乞休致上不許至冬復以為請詞益加切
乃許之特賜誥追贈其先明年二月十又九日以疾卒
于所居之第訃聞上悼惜贈太子少保賜祭于冢者再

命工部啟其配陳夫人之窆合葬焉公既卒越四月季夏之望遺腹生子以公治命名曰紫芝葬且有期稽勲陳郎中鎬於公世通家乃告予必得予銘公墓而後葬惟天順癸未予忝科第公寔司考校顧以鄉後進在門生之列其敢以不文辭乃取通政夏叅議崇文所述狀序次之按狀公諱軒字士昂姓童氏世為鄱陽文北鄉樟潭里人曾祖元愷妣孫氏祖金友妣章氏考碧瑄號玉壺妣章氏陶氏自祖以下皆以公貴贈資政大夫南

京禮部尚書姚皆夫人童本儒族至玉壺以精天官學
永樂初召充欽天監天文生尋命入文淵閣纂修天文
諸書三子皆留都後家南京秦淮之西生公幼穎敏異
常兒讀書過目成誦玉壺乃召其仲子惠來繼役而一
意教公俾攻進士業博學篤行文譽日著選充應天學生
領正統丁卯鄉薦登景泰辛未進士拜南京吏科給事
中公思舉諫職深居簡出不妄與物接嘗上疏言省冗
員公考察倡武勇擇師儒杜倖進恤京民又言南京糴

貴民多死請命官賑貸俾御史體察多見採納乙亥秩滿三載得賜勅贈封其父母妻如制時詔南京守備採辦翠毛魚鮑諸物以萬計公極言止之及英廟復辟覽公所奏嘉其敢言尋上疏言弭盜安民數事尤切時弊天順戊寅冬劾戶部張尚書鳳下獄有詔宥之明年丁嫡母章夫人憂辛巳服闋改戶科給事中癸未同考禮部會試精於校閱時稱得人甲申憲廟踐阼公首上疏言帝王之治在先本而後末隆聖德用賢才納忠諫愛

小民謹邊備之謂本而簿書刑名其末也願時引儒臣講求祖宗謨範及古帝王脩身用人之旨著為大明一經推而行之則聖德隆命在廷三品大臣歲舉堪任方面一人且嚴連坐之法進用大臣亦召三品大臣於便殿各舉一人以對俾科道糾其非則賢才用臺諫之言賞其直貸其過則忠諫納養民之政在戶部凡奏報災傷即加優恤則小民愛多方求將歷試所長文武有犯輸粟于邊則邊備謹上優詔答曰朕覽童某所言有理

修德用人納諫朕當自勉餘令諸司舉行公又言漕河
為官舟所阻請命大臣一人總其事仍乞省貢舟而嚴
禁之未幾四川盜作廷議招撫之策謂公才識足任其
事乃命公偕刑部朱司務貴奉勅以往公星馳至蜀遍
歷賊巢宣布朝廷恩威諭以禍福賊首王應高等後先
迎迓兇焰可畏聞公言皆羅拜乞生公召與同飲食示
以至誠賊出降者益衆皆慰遣之夏六月進都給事中
得便宜行事時賊首趙鐸等尤驍悍不聽撫諭遂復叛

去公偕鎮巡三司議分兵勦捕躬冒矢石斬獲無算奏
功還朝蜀人為班師圖以紀之公復言安盜賊有五去
貪官均科差蠲逋負革總部省邊運而盜自息明年夏
四川巡撫奏賊猖獗遂歸咎于公致公重辟公曰某出
萬死平賊況有鎮巡三司奏功疏在盍取驗之一言不
合甘心東市之誅時議出師公曰賊已平奚用出師不
數日捷奏至矣果然猶坐公免官賴上聖明調浙之壽
昌知縣已丑述職來朝上疏自理廷議咸以為寬於是

大宗伯姚公舉公學行宜董學政乃擢公雲南按察僉
事提調雲貴學校公務敦教本精於考校隨才造就士
風一變鎮守貴臣咸敬憚焉公復上言考察庶官宜廣
詢公論作養賢材宜優待學校於是巡按者交章薦公
請加旌擢甲午秋召拜太常寺少卿掌欽天監事公嚴
考天文陰陽諸生旁搜博訪以為用公僚屬之薦省歷
紙之費夙弊一清累以疾辭不許丁酉冬三載秩滿賜
誥賜封其考妣及妻如制己亥夏進太常寺卿仍掌監

事教諭余正已奏言歷法之差上命公與之考論不合
公上言歲差置閏其傳已久我朝考歷制象尤為精密
雖日月薄蝕不無先後晷刻之殊分秒多寡之異則以
土有南北高下之別耳正已乃謂天地有自然之冬至
以至朔望置閏皆非人力可為是不知古人以數求天
之術顧以小智亂成式宜下之吏以正其妄從之復正
天下陰陽官納粟免考之非制壬寅冬三載秩滿賜誥
有學行端潔之褒贈封其祖考考祖妣妣及妻皆如制

癸卯春以疾乞休許之及歸南京蕭然一室不異布衣
時有所餽遺非知舊不輕接納縉紳聞而重之弘治改
元戊申會欽天監官以不職罷去衆復以公薦命公仍
掌監事夏六月日有食之公言日食紀元之初當盛夏
火旺之候宜正心脩身以為取人之本格物窮理以為
燭姦之要進君子退小人以謹天戒尋辭掌天文舉吳
昊張紳高鍾者以自代是年冬復以僉舉進都察院右
副都御史奉勅提督松潘軍務兼理巡撫時蜀歲荒公

至開倉賑貸設粥以食饑餒給糧以歸流移平訟以決
久禁先是逾月不雨公至而雨亦沾足公乃為禁令三
十餘事皆安邊保民之政次第舉行復以南路鎮番一
帶苦於蠻夷出沒歲減軍糧以備犒賞軍多逃亡公奏
以四川官帑銀布代之兵食以足公復以其地險遠蠻
夷難處疏言松茂威疊戍守甚艱而疊溪一路尤甚宜
調兵設衛令一都指揮守之四處要路各設一倉以便
轉輸令一關

督察之復言沿邊衛所州縣皆在

萬山中與蠻夷共之闕堡之設有害而無利宜捐松茂之中羊腸一逕之路則闕堡倉廩可省兵無遠戍之勞民免艱運之苦蠻夷有坐困之機凡八害三利畫一以聞事下所司議不果行嘗創兵器給諸闕堡以為禦敵之具薦雲南按察使林俊可任都憲復上章請老不許辛亥春召還未至擢南京吏部右侍郎癸丑冬疏言臣年六十有九入仕四十年禮宜致仕不許甲寅夏進南京禮部尚書二年三疏懇求致仕皆不許且有操履清

慎方切委任之諭公感上知遇前後力陳數千言皆軍國之務其言朝廷大政事關門一時之議不足以決是非宜如古者公卿大夫各得獻其所議以俟上裁此最近古而格於近制亦不果行丙辰冬夫人陳氏卒時淑人授封者例無葬祭公以為請詔禮部賜祭于家工部為塋兆域盖特恩也及公卒工部復請如公今官之制遣官為之增修云公生以洪熙己巳月日享年七十有四配夫人陳氏無子側室李氏生女一曰靜娥遠錦衣

舍人黃璋蔡氏生子一即紫芝葬以卒之明年月日墓
在都城南鳳臺岡之原嗚呼天之賦公質清氣粹平居
癯然若不勝衣而強學好問至老不倦蓋公少有奇志
讀書為文淵博雄麗詩有唐人體裁足以名家書學之
精晚亦邁勁為時所重性篤孝友既入仕二親已沒事
嫡母夫人克盡子職分祿以養兄嫂撫其姪孺以及諸
孫應禎輩皆有恩故舊貧乏均為資給未嘗有闕然於
物一介不苟取至其自奉蔬食飲水泊如也廉勤慎密

無愧古人而今不可作矣惜哉所著有清風亭稿枕肱
集海岳涓埃諭蜀稿籌邊錄夢徵錄各若干卷藏於家
銘曰

先生之生川岳鍾秀沒為列宿先生之仕卓乎兩京于
蜀再行先生之學盛唐之宗渢乎清風先生之操貞女
之潔始終一節猗歟先生屢疏屢留皇眷之優天不慙
遺湊焉上征吁嗟先生卹典之頒逾于常制九原之賁焯
行著辭以識其藏鳳臺之岡

明故鎮守雲南總兵官征南將軍太子太傅黔
國公贈特進光祿大夫右柱國太師謚武僖沐
公墓誌銘

弘治丙辰九月七日鎮守雲南總兵官征南將軍太子
太傅黔國沐公以疾卒于鎮是夜有大星自東北墜于
西光芒亘天人皆見之殆非偶然也公無子既卒合鎮
文武軍耆之屬相向而哭者皆失聲已乃胥相告曰雲
南非沐氏不能守遂合辭請以故右叅將錦衣都指揮

誠之子崑為公後鎮巡重臣具以公訃及合羣情以聞上震悼輟視朝一日贈特進光祿大夫右柱國太師賜諡武僖命禮部諭祭者十六東宮諸王皆賜以祭給驛歸其喪工部營墳以葬復以雲南重鎮遂從所請命崑就鎮嗣封黔國公爵充總兵官佩征南將軍印繼守其地嗣公既受命始獲遣官奉公之喪歸葬南京江寧之祖塋且具巡撫雲南副都御史張公汝欽所述事狀緘書走幣請予為銘以誌其藏按狀公諱琮字廷芳姓沐

氏別號益菴又號東山居士其先鳳陽定遠人曾大父
英開國輔運推誠宣力武臣特進榮祿大夫柱國西平
侯追封黔寧王諡昭靖大父晟顯忠輔運推誠宣力武
臣特進榮祿大夫右柱國太傅追封定遠王諡忠敬父
斌總兵官黔國公諡榮康母梅氏贈黔國太夫人公生
之日百鳥翔集人以為異未晬失怙從兄璘號繼軒有
文武才由都指揮陞右都督充總兵官佩征南將軍印
繼鎮雲南撫公友愛篤至四五歲時常抱置膝上教以

詩書八歲就學不數月即能了涉孝經論語小學諸書
大義善屬對應荅如響未幾璘卒朝廷以公尚幼復命
璘弟瓚嗣兄職為都督同知繼鎮雲南仍授公冠帶食
祿之半以俟公日與縉紳士夫遊揖讓進退有老成風
嗜學不怠詞翰兼美人咸器之成化乙酉入朝嗣黔國
爵憲廟寵眷有加丙戌春奉勅往河南主行鄭靖王喪
禮有白金文綺之賜丁亥三月命還鎮雲南如祖宗故
事勅旨諄切錫賚優渥仍俾兄瓚協同贊理公沉毅有

為不妄言笑勤於為政公退不入私室冠帶終日寒暑
無間精究簿書事無壅滯凡白事者雖僕隸走卒亦引
見於庭上下之情無復壅遏每遇脩貢或拜進表文必
焚香遣使不遑寧處聖壽歲節行禮敬肅如在上前朔
望謁孔子廟退坐明倫堂使諸生執經進講誘掖獎勸
無所不至作興學校完飭禮器給學田展解額設宴禮
以興起後進惠養鰥寡驅除貪暴物害既去人隱畢宣
嘗奉勅督理軍儲留意屯田修治水利慎簡羣僚分任

其事不數年間田無惰農度有餘積矣或雨暘愆期有
禱輒應民謳歌之農暇修邊壘飭驛傳因時訓練振揚
威武道路險要之處增建哨堡置兵守之是以盜賊銷
弭疆圉晏然每邊夷執贄來見一無所受賞以酒肉幣
帛諭以朝廷恩威而遣之威德遠被諸夷敬服甲午安
南國王遣陪臣何瑄至邊以假道為名窺覘虛實公逆
知其情拒不許詐不得騁則侵老撾以啓釁公具以聞
請勅切責復命各夷酋長整搦軍馬慎固封守以防不

虞交人知我有備不敢肆侮遣使詣闕謝罪云戊戌尋
甸府土官知府安晟卒弟倘謀殺其子瑄欲爭襲兄職
公遣官兵擒倘以聞明正典刑廣西府土官知府昂貴
殘暴虐民抗拒官司其千百夫長龍判龍關各逞夷情
動輒讐殺委官審勘擒捕及昂貴死遺子不許承襲二
府皆奏請革去土官銓流官以治之開設學校教之禮
義百姓安焉其馬隆麗江劍川順寧羅雄等處蠻夷弗
率皆量遣官軍以次掃定既而臨安府石屏州昌明里

強賊番撒聚衆搶虜附近村寨勢漸猖獗命三司都指揮吳瑤等調漢土官軍及民兵往征之格殺番撒斬賊級百餘殘孽潰散民免於擾巳亥鉄關菁赤石崖等處羅羅尅習嘯聚山林流劫大理等府公奏調楚雄等府衛漢土馬步官軍民兵命三司都指揮周佐等授以成算督率分守指揮馬鉉等分道進兵攻散其衆斬獲尅習俘男婦百餘賊平復請添設大羅衛兵川州以為保障從之朝廷嘉其功賜勅獎諭尋遣使賜以匾甲壬寅

奉勅偕都御史程公琮往撫孟密所過州縣秋毫無擾
時有以平孟密方畧獻者公斥之曰自征麓川以來軍
民凋弊極矣我寧被不善控禦之名不忍復事窮兵黷
武之禍聞者韙之癸卯橋甸賊首師五聚衆為亂張旗
幟稱總管剽掠鄉村焚毀解宇走解軍民敵殺官軍安
寧鎮南廣通祿豐易門十數州縣咸被其害乃與鎮巡
重臣合議命三司都指揮趙晟等調漢土官軍民兵分
道進攻斬首千餘級俘男女數百人生擒師伍暨其妻

拏境內始安具錄將校首功以聞朝廷特賜勅歷叙公
在鎮功績加授太子太傅以嘉獎之乙巳南富蒲賊莽
丘負固距險搔擾永昌等處地方行旅不通民多殺傷
復命晟等率兵以往且諭之曰山路險阻難於攻圍宜
以計取至則果如公命生擒莽丘及同惡渠魁以歸宥
其脅從一境悉平弘治改元戊申今上即位之初念公
久鎮外藩特遣使賜以白金文綺已酉賞平橋甸功將
校陞秩有差復遣使賜公白金文綺公生長勲貴穎敏

過人端勤有守苞苴不敢及門精究武經諸家兵法及陰符奇門諸書知用兵之要每命將出師算無遺策所向有功平居孳孳嗜學手不釋卷至於陰陽卜筮星命之術靡不究心善草書自成一家歌詩樂府富麗可觀性孝友自痛早孤事母竭盡子職及卒哀毀喪葬以禮待族黨咸有恩意御下寬而有制不事嚴刻雅量汪洋喜怒不形勢位已極戒滿思危兢兢業業未嘗有過衆方以遠大期之而遽止於斯惜哉其生為景泰庚午閏

卷二十三
正月十又三日春秋四十有七而已配王氏成山侯某
女繼王氏金吾左衛指揮同知某女皆封黔國夫人葬
以己未三月某日銘曰

大明天開神聖有作猗歟昭靖從龍奮躍撫馭滇南疆
土恢拓勲賢世繼德業並焯爰有武僖蚤嗣穹爵克繩
祖武丕闡戎畧雄藩載寧亂賊屢縛螽蟥畢驅氛祲以
廓隱然長城萬里之託聲望日隆寵賚亦渥胡積之厚
而壽之約星芒宵沉遐邇駭愕卹典渙頒永慰冥漠隆

隆者封如舟在壑我銘以藏庶亦無作

青谿漫稿卷二十三